

आकाशवाणी

1. प्रधानमंत्री नरेन्द्र मोदी होंरें अमरीकी उपराश्ट्रपति जे.डी. वेंस हुंदे कन्नै फोन पर गल्लबात करियें भारत ते अमरीका बश्कार कुलसंसारी सतह उप्पर व्यापक रणनीतिक सांझ-भ्याली गी होर मजबूत करने दे उपाएं पर चर्चा कीती।
2. राश्ट्री गीत वंदे मातरम् दी 150मीं ब'रेगंड दे कन्नै अज्जै थमां मुख्य भरै च हर घर तिरंगा अभियान शुरु होआ करदा ऐ।
3. केंद्र सरकार ने मद्रास, कलकत्ता, मध्य प्रदेश ते कर्नाटक हाईकोर्ट च कुल 30 नमें जजें दी नियुक्ति कीती ऐ।
4. श्री अमरनाथ जी दी जातरा खराब मौसम ते रस्ता साफ करने दे कम्मै दे चलदे अज्ज बी बालटाल ते पैहलगाम आहले दौने रस्तेआ रोकी रक्खी गेदी ऐ।
5. मौसम विभाग ने अज्ज उत्तराखंड ते छत्तीसगढ़ च मौलेधार बरखा बरने दी ऑरेंज अलर्ट आहली चेतावनी जारी कीती ऐ।
6. चीन दे हेफेई च आयोजित 9मीं वल्ड यूथ ट्रान्सनेशनल चैंपियनशिप च भारत दे साग्निक राय ते सायंतन कुशारी दी जोड़ी ने 31एं ब'रें कोला हेठली उम्मी दे मुकाबले च सुन्ने दा तगमा जितेआ ऐ।

PM-Vice Prez.

प्रधानमंत्री नरेंद्र मोदी ते अमरीका दे उपराष्ट्रपति J.D. Vance होरें भारत-अमरीका व्यापक वैश्विक रणनीतिक सांझ-भ्याली गी होर मजबूत करने दे उपाएं पर चर्चा कीती ऐ। अमरीकी उपराष्ट्रपति होरें कल मोदी होरेंगी टेलीफोन कीता हा। सोशल मीडिया दी इक पोस्ट च श्री मोदी होरें दस्सेआ जे उ'नें बपार, रक्षा, महत्वपूर्ण ते नमीं ठीरदी तकनीकें, उर्जा सुरक्षा ते महत्वपूर्ण खनिजें दे खेतर च सहयोग बधाने दी बचनबद्धता गी फही पक्का कीता। दौनें नेताएं आपसी हितें कन्नै जुड़े दे इलाकाई ते कुल संसारी सतह दे मुद्दे पर बचार बटांदरा कीता।

<><><><><><>

Har Ghar Tiranga

हर घर तिरंगा अभियान अज्जै थमां शुरू होआ'रदा ऐ ते इस महीने दी 17 तरीक तगर चलग। इस अभियान दा मकसद अपने घरें पर तिरंगा फैहराने ते देशभक्ति ते राष्ट्री एकता कन्नै जुड़े दे कार्यक्रमें च हिस्सा लैने लेई लोकें दा दिल बधाना ऐ। एह् अभियान 2022 च शुरू होआ हा ते हुन एह् इक बड्डे जनभागीदारी अभियान दा रूप लेई चुके दा ऐ। इस बारे इस अभियान दा बशेष महत्व ऐ, कीजे एह् राष्ट्री गीत वंदे मातरम दी 150मीं ब'रेगंड दे कन्नै मनाया जा'रदा ऐ। इस समारोह दे तैहत देश भरे च वंदे मातरम दा सामूहिक गायन बी होग। 14 अगस्त गी विभाजन विभीषिका स्मृति दिवस मनाया जाहग।

<><><><><><>

High Court Judges

केंद्र सरकार ने चार हाईकोर्ट च 30 नमें जजें दी नियुक्ति कीती ऐ। इंदे च मद्रास, कलकत्ता, मध्य प्रदेश ते कर्नाटक हाईकोर्ट शामिल न। सबनें शा मते 15 जजें दी नियुक्ति मद्रास हाईकोर्ट च होई ऐ। एहदे अलावा कलकत्ता हाईकोर्ट च 8, कर्नाटक हाईकोर्ट च 6 ते मध्य प्रदेश हाईकोर्ट च इक जज दी नियुक्ति कीती गई ऐ। कनून ते न्यास मंत्रालय मूजब, इनें 30 जजें च 20 वकील ते 10 न्यायिक अधिकारी शामिल न। इनें नियुक्तियें गी राष्ट्रपति होरे भारत दे मुख न्याधीश ते सुप्रीम कोर्ट कॉलेजियम कन्ने सलाह दे मगरा मंजूरी दिती ऐ। नमें नियुक्त कीते गेदे जज तौले गै संगंध चुक्कियै अपना कार्यभार सांभी लैडन। इनें नियुक्तियें कन्ने एकडे चैनें हाईकोर्ट च जजें दी कमी दूर करने ते बकाया पेदे मामले दे नबेडे च तेजी औने दी मेद ऐ।

<><><><><><>

Shah Kakori Train

गृह मंत्री अमित शाह होरे काकोरी ट्रेन घटना दे अमर क्रांतिकारियें गी श्रद्धांजलि अर्पित कीती ऐ। सोशल मीडिया पर इक पोस्ट च श्री शाह होरे आखेआ जे काकोरी ट्रेन घटना भारत दे सुतेंतरता संग्राम दा इक कदे नेई भुल्लने आहला ध्यास ऐ, जिसने बरतानिया हकूमत दी बेन्यायी ते जुल्मे खलाफ सशस्त्र क्रांति गी नमीं रफ्तार प्रदान कीती ही।

<><><><><><>

MoS-EAM

विदेश राज्य मंत्री कीर्ति वर्धन सिंह होरें कल आबिदजान च कोटे डी आइवर दे राष्ट्रपति अलासाने औटारा हुं'दे'नै मलाटी लाइयै भारत ते कोटे डी आइवर बशकार बधदी सांझ-भ्याली पर चर्चा कीती। श्री सिंह होरें अफ्रीका दे कन्नै मजबूत ते व्यापक सरबंघें गी अग्गे बधाने दे प्रधानमंत्री नरेंद्र मोदी हुं'दे नजरिये दे प्रति भारत दी वचनबद्धता गी फही पक्का कीता। सोशल मीडिया पोस्ट च श्री सिंह होरें आखेआ जे ओह भारत ते कोटे डी आइवर दी लम्मे समें थमां चलदी आवा'रदी दोस्ती गी होर मजबूत करने ते बक्ख-बक्ख खेतरें च दाक्खी सैहयोग बधाने दे पक्ख च न।

<><><><><><>

SANJY Suspended

श्री अमरनाथ जी दी जातरा खराब मौसम ते रस्ता साफ करने दे कम्मै दे चलदे अज्ज बी बालटाल ते पहलगाम दौनें दस्तेया रोकी रक्खी गेदी ऐ। कश्मीर दे डिविजनल कमिशनर अंशुल गर्ग होरें इक बयानै च आखेआ ऐ कि हालिया बरखें कारण जातरा रस्ते पर कई संवेदनशील थाहें पर फौरी तौरा पर मरम्मत करना बड़ा जरूरी होई गेदा ऐ ते ऐसी स्थिति च जातरा करना पूरी चाल्ली सुरक्षित ऐ। उनें आखेआ कि सीमा सड़क संगठन-बी.आर.ओ आसेआ मरम्मती दा कम्म युद्ध स्तरै पर जारी ऐ।

<><><><><><>

Weather

मौसम विभाग ने अज्ज उत्तराखंड ते छत्तीसगढ़ च मौलेधार बरखा बरने दी ऑरेंज अलर्ट आहली चेतावनी जारी कीती ऐ। हरियाणा, चंडीगढ़, हिमाचल प्रदेश, पंजाब, उत्तर प्रदेश, बिहार, राजस्थान, झारखंड, मध्य प्रदेश ते पूर्वोत्तर दे इलाकें च बी अज्ज तेज बरखा बरी सकदी ऐ। विभाग ने जम्मू-कश्मीर, आंध्र प्रदेश, केरलम, माहे, कर्नाटक, तमिलनाडु, पुदुचेरी, कराईक्कल, लक्षद्वीप ते अंडमान-निकोबार टापुएं च अज्ज बिजली मिलकने ते अंधी-झकखड़ दी शेंका जताई ऐ। तोआई मौसम विभाग ने औने आहले हफते दरान जम्मू-कश्मीर च इक बारी फही मौसम खराब रौहने दी भविक्खवाणी करदे होई जम्मू खिते च भारी थमां बड़ी भारी बरखा बरने दी चेतावनी जारी कीती ऐ। विभाग मूजब अज्जै थमां लेइयै औंदी 11 अगस्त धोड़ी केई थाहें पर चानचक्क हाड़ औने दा खतरा बी पैदा होई सकदा ऐ। जम्मू खिते दे किश जिलें च औने आहले दिनें दरान भारी थमां बड़ी भारी बरखा बरने दे असार दस्से गे न। तोआई कश्मीर घाटी च 12 थमां 17 अगस्त तगर किश जिलें च भारी बरखा बरी सकदी ऐ।

<><><><><><>

Jharkhand

झारखंड च जे.पी.एस.सी और जे.एस.एस.सी भर्थी म्तेहानें च कथित अनियमितताएं खलाफ बरोध प्रदर्शन करा'रदे विद्यार्थी अज्ज रांची च राज्य सरकार दे प्रतिनिधियें कन्नै अगले दौर दी गल्लबात करडन। एहदे शा पैहले

सरकारी पैनल ने मुखमंत्री हेमन्त सोरेन हुं'दे कन्नै बैठक लाइयै उ'नेंगी विद्यार्थिएं कन्नै होई दी पैहले दौर दी गल्लबात च हासल प्रगति बारे जानकारी दिती। ध्यानजोग ऐ जे रांची आहले सरकारी गेस्ट हाउस च कल बरोध प्रदर्शन करा'रदे विद्यार्थिएं ते सरकार दे प्रतिनिधिएं बश्कार पैहले दौर दी उच्च-स्तरी गल्लबात होई ही। सरकार दे प्रतिनिधिएं आखेआ ऐ जे ओह म्तेहानें सरबन्धी प्रणाली च व्यापक सुधार जकीनी बनाने लेई वचनबद्ध न। राज्य सरकार ने विद्यार्थिएं ते होरनें सरबन्धत धड़ें कोला उं'दे सुझास मंगगने लेई इक अधिकारी ई-मेल आईडी बी जारी कीती दी ऐ। तोआई विद्यार्थी नेता रविंदर पासवान होरें आखेआ ऐ जे विद्यार्थी पिच्छले 15एं दिनें थमां बेमियादी भुक्ख हड़ताल पर बैठे दे न ते उ'नें बड़े व्यापक ढंगे कन्नै अपनियां मंगां सरकार अगगे रक्खी दिती दिआं न।

<><><><><><>

Iran-Prezi

ईरान दे राष्ट्रपति मसूद पेजेशकियान होरें आखेआ ऐ कि तेहरान अमरीका कन्नै शांति ते गल्लबात दा रस्ता खुल्ला रक्खग। अजें कि एहदे लेई अमरीका गी दौनें मुख्यें बश्कार बसाह भरोसे आहला म्हौल बनाना होग। पेजेशकियान होरें आखेआ कि कुसै बी समझौते लेई एह बनकदा समां ऐ। उनें साफ कीता कि ईरान, अमरीका दे वायदे ते कारवाइएं मताबक गै अपनी बचनद्धता निभाग। एहदे शा पैहले बी पेजेशकियान होरें आखेआ हा कि ईरान अपने अधिकारें दी

रक्षा लेई गल्लबात जारी रक्खोग पर कुसै दे दबाव हेठ आइयै आत्म समर्पण
नेई करग।

<><><><><><>

World Bridge Fed C'ship

चीन दे हेफेई च आयोजित 9मीं वल्ड यूथ ट्रान्सनेशनल चैंपियनशिप च भारत
दे साग्निक राय ते सांयतन कुशारी दी जोड़ी नै 31 बरें कोला हेठली उम्मी दे
मकाबले च कल सुन्ने दा तगमा जित्तेआ ऐ। पैहले गेड़ दे खेड्डे गेदे मकाबले
च 34 जोड़िएं हिस्सा लैता जिंदे च अक्वल 14 जोड़ियां फ्लाइट-ए च पुज्जी
गेइयां न जिंदे च एह् भारती जोड़ी बी शामिल ऐ।

<><><><><><>